



TRUN CONTA

46avla fiasta da cant districtuala
15 da zercladur 2024

Communicaziun da medias 1

Trun, 15. November 2023

Trun conta – la Fiasta da cant districtuala 2024

Che la cultura da cant da chors ha ina groda e ferma tradiziun en Surselva ei enconuscent. Era a Trun ei quei stau ed ei quei aunc oz il cass! Quei fatg ha motivau il Chor cecilian d'organisar egl onn giubilar «600 onns Ligia Grischa» la 46avla Fiasta da cant districtuala. Quella ha liug la sonda dils 15 da zercladur 2024.

«Schi ditg che stattan cuolms e vals..» han nos babuns engirau 1424 a Trun sut igl ischi. 2024 han liug diversas festivtads sut il tetel «Sut igl ischi 2024 – 600 onns Ligia Grischa». La fiasta da cant ei integrada en quellas aschia che nos chors han la caschun da purtar quei di omagi a «nos babs seradunai a Trun sut igl ischi.....».

Trun cun ses 1200 habitontas e habitonts ei in liug che porscha relaziuns idealas per ina fiasta da cant - ina vischnaunca cun gronda tradiziun e cultura da cant e musica, in liug cumpact cun ina buna infrastruttura.

District da cant dalla Surselva

1867 ei il District da cant dalla Surselva vegnius fundas cun gl'intent da cultivar il cant da chors enteifer siu territori, da sustener las activitads dils singuls chors, da promover la qualitat e la derasaziun dil cant. Da present dumbra il District 33 chors da carschi cun da quei da ca. 950 cantaduras e cantadurs (25 mischedai e 8 virils). Dasperas dat ei en Surselva aunc dus chors da giuventetgna, treis d'affons e quarter chors cecilians ch'eiin buca commembers dil District. Tochen oz han 45 fiastas da cant districtualas giu liug. Da quellas 45 ein tschun stadas a Trun: 1879 (19 chors), 1890 (21 chors), 1905 (18 chors), 1930 (31 chors) e 1960 (40 chors).

Las annunzias

La planisaziun per la fiasta progredescha cun ried. Ils 31 chors ch'ei s'annunziar provisoriamein han ussa temps tochen ils 15 da december 2023 da s'annunziar definitivamein. Trun quenta da saver beneventar 32 chors. Il di da fiasta vegnan ca. 1000 cantaduras e cantadurs a mussar lur habilitads canticas. Ultra da quei quantan ins cun ina gronda respada da fiasta.

La fiasta

La finamira ei d'organisar ina fiasta che dat caschun da tgirar e promover la cultura da cant, da sentupar e da star da cumpignia. Cun duas salas, ina casa da scola, la baselgia s. Martin, la caplutta s. Onna, la Sala d'art, il museum Cuort Ligia Grischa, il plaz da scola sco "vitget da cant" e las ustrias el vitg stat ina infrastruttura ideala a disposiziun. Tuttas producziuns da pag vegnan dadas en baselgia parochiala. Aschia san tut ils chors profitar dalla medema buna acustica. Ils discuors d'experts han liug el museum Cuort Ligia Grischa. Il center da fiasta ei il "vitget da cant". Il plaz scola ed il plaz avon il Center communal vegnan transformai en in "vitget da cant» cun diversas tendas e stans da nutriment. Nus lein integrar la fiasta el vitg ed il vitg en la fiasta!

Voluntaris

L'organisaziun dalla fiasta succeda en stretga collaboraziun cun las autoritads communalas, culs responsabels dil District da cant dalla Surselva e cul comite «Sut igl ischi 2024 - 600 onns Ligia Grischa». Per saver garantir in andament irreproschabel dalla fiasta drova ei numerusas gidontras e numerus gidonters. Tgi ch'ei interessaus da cooperar sco voluntari anfla ulteriuras informaziuns sco era in formular d'annunzia sin la pagina d'internet www.trunconta.ch.

Comite d'organisaziun Trun conta 2024

Sclariment dat bugen:

Giusep G. Decurtins, president

Telefon 079 3 555 777

E-Mail decurtins.falera@bluewin.ch

www.trunconta.ch